

T695/2911(8)

81

CM	0	1	2	3	4	5	6	7	8	9	10	11	12	13	14	15	16	17
Lab D50 2*	95/0/2	81/0/0	66/0/0	51/0/1	35/0/0	20/0/0	29/19/54	55/39/33	42/57/29	82/4/79	51/50/13	50/28/29						
	38/14/16	66/16/18	50/5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68						

HARVARD-YENCHING LIBRARY
HARVARD UNIVERSITY
2 DIVINITY AVENUE
RINROKAKU

JAN 14 1969

春秋說約卷之十一

定公

名宋襄公子昭公弟
周敬王十一年即位

元年

春王

公羊傳定何以無正月。正月者正即位也。定無正月者。即位後也。即位何以後在季氏也。

三月晉人執宋仲幾于京師

哈佛大學哈佛燕京
圖書館珍藏印

城天子之都。義也。仲幾不受功。不義也。以義討不義。當也。然在尊者之側。請命而後執。可也。不請命而歸于王。亦可也。以大夫在尊者之側。執人而不歸于王。則無王矣。故稱人。以示貶。以為雖執得其罪。而不與其專也。

夏六月癸亥公之喪至自乾侯戊辰公即位

定公至六月始即位。見季氏之制也。季氏廢昭公嫡嗣而立公子宋。故公不復討季氏之罪。

秋七月癸巳葬我君昭公

九月大雩

立煬宮

煬公伯禽之子。其廟已毀。季氏立其宮者。以煬公為考公之弟而繼兄。今我立定公。亦是以弟繼兄。以為非吾私意。蓋魯國之舊制云爾。

冬十月隕霜殺菽

菽性耐霜而霜殺他可知矣。是。是非常之災。故書之。

二年

春王正月

夏五月壬辰雉門及兩觀災

火災也。

秋楚人伐吳

報雞父之役而召柏舉之敗。

冬十月新作雉門及兩觀

魯僭用天子之禮舊矣。天示變以警之。又從新而加于其舊。勞民傷財而莫之恤也。

三年

春王正月公如晉至河乃復

怒公立而未往告故辭公以示其意所以明年因會而請盟也。

二月辛卯邾子穿卒

夏四月

秋葬邾莊公

冬仲孫何忌及邾子盟于拔

以大夫與君盟輕邾也。肩父葬而會盟不子也。

四年

春王二月癸巳陳侯吳卒

三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏于召陵侵楚

楚為不道而子常以求蔡侯之裘唐成之駟弗與而止唐蔡之君三年晉人請命于周合諸侯以伐之義也乃荀寅求貨于蔡弗得遂沮召陵之謀故書侵以賤之也

夏四月庚辰蔡公孫姓帥師滅沈以沈子嘉歸殺之

為沈子不會召陵晉使蔡伐之蔡滅國殺嘉何其暴也沈雖楚與國此豈足以洩楚憾哉

五月公及諸侯盟于臯鼬

公以不獲見于晉故因會而求盟則此盟公意也故書公及

杞伯成卒于會

六月葬陳惠公

許遷于容城

楚令也而許有違害就利之意自願遷也故以自遷為文

秋七月公至自會

不至侵楚譏無功也

劉卷卒

王臣不卒此為同盟故來告而書

葬杞悼公

楚人圍蔡

為滅沈故

晉士鞅衛孔圉帥師伐鮮虞

伐鮮虞晉六卿之利也故荀氏士氏趙氏交伐以顯其績

葬劉文公

魯往會非禮也

冬十有一月庚午蔡侯以吳子及楚人戰于柏舉楚師

敗績楚囊瓦出奔鄭

書以蔡為王兵。而乞吳師。吳為之用也。春秋與蔡之能以吳。深罪晉人貪利棄義。難于救蔡也。然則何不言救。閻閻子胥伯嚭。本懷謀楚。蔡人往請。會逢其適。非有救患恤鄰。從簡書之實也。囊瓦貪以敗國。而不能死。故記其出奔以賤之。

庚辰吳入郢

入郢即入楚。非滅楚。故曰入吳。不稱子史畧文。

五年

春王三月辛亥朔日有食之

夏歸粟于蔡

以蔡為楚所困。飢乏之故也。

於越入吳

於越者其所稱舊號。其入吳以吳在楚也。吳楚爭而後越入中國。

六月丙申季孫意如卒

秋七月壬子叔孫不敢卒

季平子叔孫成子卒。桓子武叔皆幼。國命為陽虎所執矣。

冬晉士鞅帥師圍鮮虞

六年

春王正月癸亥鄭游速帥師滅許以許男斯歸

因楚敗之許恃楚以固今以楚敗不能救而鄭滅其國執其君亦太甚矣

三月公侵鄭

鄭保蕞瓦滅許故晉命公與師討之是時季孫斯初嗣卿位陪臣陽虎執國命又迫于晉令進退皆不由公也

公至自侵鄭

夏季孫斯仲孫何忌如晉

斯如晉獻鄭俘也陽虎強使孟懿子往報夫人之幣是二卿如晉為陽虎所制也

秋晉人執宋行人樂祁犁

祁犁至晉趙簡子逆而與飲酒于繇上獻楊楸六十于簡子范獻子言于晉侯曰祁犁未致使而私飲酒不敬二君不可不討乃執祁犁犁固有罪而范趙以貪賄爭權而執之故書執行人以著其罪

冬城中城

中城魯君所居。陽虎欲去三家。故托懼齊鄭而城中城。將挾公以自固耳。

季孫斯仲孫忌帥師圍郕

為郕貳于齊也。何忌不言何闕文。

七年

春王正月

夏四月

秋齊侯鄭伯盟于鹹

謀叛晉也。是時齊晉兩國相為強弱。晉強則同諸侯以附晉。然齊侯多遣世子大夫從事。心固不甘服晉也。晉弱則合諸侯以自強。若魯衛鄭則視之以為向背也。是盟也。齊景圖伯之始事。然天王方避僖廟之難。出居姑猶。景不能伸勤王之義。徒強鄭衛之盟。何益哉。

齊人執衛行人北宮結以侵衛

為盟鹹徵衛不至。衛使行人往謝而執之。故稱執行人以示貶。

齊侯衛侯盟于沙

傳謂衛侯欲叛晉。諸大夫不可。使結如齊而私于齊侯曰。執結以侵我。齊侯從之。乃盟。

大雩

齊國夏帥師伐我西鄙

為魯事
晉也。

九月大雩

冬十月

八年

春王正月公侵齊

報國夏
之伐也。

公至自侵齊

二月公侵齊

為未得
志故。

三月公至自侵齊

曹伯露卒

夏齊國夏帥師伐我西鄙

報再
侵也。

公會晉師于瓦

此晉來救。而齊已去。故公逆於瓦而會之。不曰會士鞅。而稱會晉師。重師也。夫魯大國也。三家合力。亦可敵齊。特以制于陽虎。致公遠出求晉。已非謀國之道。况晉方貪賄。伯業已衰。究何益乎。

公至自瓦

秋七月戊辰陳侯柳卒

晉士鞅帥師侵鄭遂侵衛

招攜以禮。懷遠以德。鹹沙之盟。諸侯已叛晉矣。乃不思德禮是務。而欲恃力服人。亦烏可得乎。故兩書侵以鄙之。

葬曹靖公

九月葬陳懷公

季孫斯仲孫何忌帥師侵衛

為晉興師也。非己意而迫于人。故說之。

冬衛侯鄭伯盟于曲濮

結叛晉以固其謀也。

從祀先公

傳謂順祀先公。蓋以升僖于閔。上為逆祀。今復以閔居僖上也。

盜竊寶玉大弓

盜陽虎也。虎作亂弗勝。如宮取寶玉大弓。入于謹陽關以叛。

九年

春王正月

夏四月戊申鄭伯蕞卒

得寶玉大弓

追者得之。然不獲盜。則亦幸而得之耳。

六月葬鄭獻公

秋齊侯衛侯次于五氏

齊衛欲伐晉也。然晉尚強。未敢輕進。故次于五氏。可則進。不可則退耳。

秦伯卒

冬葬秦哀公

十年

春王三月及齊平

兩國屢相侵伐。至孔子為相。與齊釋怨相平。而齊受之。故魯及齊平。

夏公會齊侯于夾谷。公至自夾谷。

齊魯世為婚姻。自定公即位。日尋干戈。侵伐不已。孔子當國。首以講信修睦為事故。有夾谷之會。齊景方志求伯。又以孔子在魯。原欲親魯以為之援。遂懼然釋向來之恨。而以鄆謹龜陰來歸。洵聖德

之所孚也。傳載萊兵劫魯侯。優施舞幕下之事。朱子以此事為附會。凡侈言夾谷之功者。皆淺心陋識。未聞孔子之道者也。

晉趙鞅帥師圍衛

為五氏之次也。然不討齊而圍衛。晉固怯大而凌小也。

齊人來歸鄆龜陰田

書來歸。齊人心服而歸。此緩之新來之效也。孔子是年為大司寇。

叔孫州仇仲孫何忌帥師圍郕

二子之圍郕。為侯
犯據郕以叛也。

秋叔孫州仇仲孫何忌帥師圍郕

侯犯之叛。視三家而效之也。負固不屈。至于再圍。在叔孫既不能改過而守臣節。使家隸感動以自化。又不能聲明其罪以誅之。乃使犯之僚屬駟赤為詐諉之謀。誘之出走。亦無可奈何矣。

宋樂大心出奔曹

宋公子地出奔陳

冬齊侯衛侯鄭游速會于安甫

以衛有晉難也。是時諸侯雖叛晉而齊景亦不能復伯也。

叔孫州仇如齊

侯犯據郕而叛。既而以邑奔齊。齊以郕仍歸魯。此聖化所感。不然齊何有于叔孫哉。所以武叔如齊謝致郕也。

宋公之弟辰暨仲佗石彊出奔陳

宋公以私寵向魋之故。使其母弟國卿羣然奔叛。蓋君不君。則臣不臣也。

十有一年

春宋公之弟辰及仲佗石彊公子地自陳入于蕭以叛

書及辰爲主也其三人則從之者也。

夏四月

秋宋樂大心自曹入于蕭

從辰以叛也。

冬及鄭平叔遷如鄭蒞盟

魯始顯然叛晉矣書及內爲志也齊魯鄭衛四國之好成晉遂失諸侯不可復收矣。

十有二年

春薛伯定卒

夏葬薛襄公

叔孫州仇帥師墮郕

孔子方仕于朝而仲由爲季氏宰建墮三都之議以絕陪臣之禍帥師者恐侯犯餘黨也。

衛公孟彊帥師伐曹

季孫斯仲孫何忌帥師墮費

季氏之城費與叔孫之城郈將以自利不料反資家臣所據以叛仲尼順天理而言之適有以動乎其心故墮郈墮費皆天理之萌因自墮之也

秋大雩

冬十月癸亥公會齊侯盟于黃

固叛晉之交而晉其衰矣。

十有一月丙寅朔日有食之

公至自黃

十有二月公圍成公至自圍成

成之未克墮孟氏自不欲墮也蓋公歛處父在成方有功于孟氏孟氏信任之故將墮成處父謂孟孫曰無成是無孟氏也子偽不知我將不墮此孟氏所以不往而公往也夫三都已墮其二成即不墮固亦未害夫子久之必有處耳惜乎魯國方治而女樂來不復可與有為矣

十有三年

春齊侯衛侯次于垂葭

與九年次五氏同

桑蛇淵圍

非時勞民此夫子已去矣

大蒐于比蒲

此三家分軍私歛蒐閱軍實以自固也非時非制不足言矣

衛公孟彊帥師伐曹

公晉趙鞅入于晉陽以叛

鞅以故而荀寅范吉射伐趙氏之宮。鞅乃入其私邑晉陽以拒二人也。而書叛何也。據邑擅兵不出

君命不知投鼠忌器之義也

冬晉荀寅士吉射入于朝歌以叛

韓魏與荀士不睦以公既逐趙請逐二子二子伐公國人助公二子敗乃入公邑朝歌以叛晉六卿韓趙魏二荀氏荀寅為中行氏荀躒為知氏士氏即范氏二荀自此亡知氏春秋後亡故止韓趙魏三家分晉

晉趙鞅歸于晉

趙以韓魏為援故請于公而得歸寅與吉射無援故終叛著晉侯之失政刑也

薛弒其君比

十有四年

春衛公叔戌來奔衛趙陽出奔宋

靈公不道南子不婦公叔戌欲正之但素未能自正而遽欲正君難矣由是得罪出奔衛之亂從此始矣

二月辛巳楚公子結陳公孫佗人帥師滅頓以頓子牂

歸

陳猶從楚暴虐小國書以誅楚而罪陳也

夏衛北宮結來奔

為公叔戌之故也

五月於越敗吳于檣李與子光卒

書敗者詐戰也傳謂吳伐越越患吳之整使罪人三行屬劍于頸師屬之曰越子因而伐之大敗之靈姑浮以戈傷闔閭將指還卒于陘夫差不忘殺父之仇三年乃報越春秋是以惡越之詐也

公會齊侯衛侯于牽

為晉人圍朝歌而謀救范氏中行也

公至自會

秋齊侯宋公會于洮

為范氏故是時衛有公叔皮之難宋有公子辰難齊景不能為二國定難乃合謀以助晉之叛臣衛宋不能自討叛臣而惟齊之從皆非也

天王使石尚來歸服

魯未助祭而歸服非禮也

衛世子蒯聵出奔宋

蒯聵恥其母南子有淫行而得罪南子誣以聵欲殺予諾于靈公聵乃出奔

衛公孟彊出奔鄭

公疑其為蒯聵之黨而逐之

宋公之弟辰自蕭來奔

書弟罪宋公也書自蕭罪辰據邑以叛也書來奔罪公納叛臣也

大蒐于比蒲

不書公者三家所為也

邾子來會公

會公于比蒧皆非禮也

城莒父及霄

為叛晉助范氏懼而城二邑也書一時而城二邑罪勞民也是年脫冬字

十有五年

春王正月邾子來朝

傳謂邾子執玉高公受玉卑子貢知二君有死亡之禍

鼯鼠食郊牛牛死改卜牛

二月辛丑楚子滅胡以胡子豹歸

召陵之會頓胡皆同謀侵楚此楚滅頓與胡所以快宿恨也

夏五月辛亥郊

壬申公薨于高寢

不于路寢非正也

鄭罕達帥師伐宋

宋公子地奔鄭。鄭為之伐宋。欲取地以處之。非義也。

齊侯衛侯次于渠蔭

謀救宋也。書次不果救也。齊景初求諸侯。而得魯衛。皆鄭之謀。後宋盟洮。宋亦來附。今鄭伐宋。救宋則失久好之鄭。不救則失新附之宋。故出兵觀望。此其奸謀也。

邾子來奔喪

秋七月壬申姒氏卒

哀公母

八月庚辰朔日有食之

九月滕子來會葬

非禮也。

丁巳葬我君定公雨不克葬戊午日下昃乃克葬

為雨不克葬。說無備也。

辛巳葬定姒

冬城濼

謀伐邾也。是年春邾子來朝。定公之喪。又來奔。事魯亦謹矣。乃魯猶謀伐之。不仁不義。何至此哉。

春秋說約卷之十二

哀公

名蔣。定公子。敬王二十六年即位。

元年

春王正月公即位

繼正也

楚子陳侯隨侯許男圍蔡

報柏舉也。入郢，撻平王之尸，吳也。楚不能報吳，而釋恨于蔡，凌弱也。其志在蠶食小國，以為利耳。或謂蔡從吳入郢，當得此報，而楚為復仇，不為過也。然楚之誘殺蔡侯，般而滅其國，用隱大子于岡山，以一表之，故拘昭侯于南郢，蔡之從吳為復仇也。楚又安得藉口復仇乎？書圍者，不使楚盡其虐，而滿其辭也。此聖人之微意也。

饑鼠食郊牛，改卜牛。

夏四月辛巳，郊。

秋，齊侯、衛侯伐晉。

救范氏也。真書伐晉，同于列國。文公伯業盡矣。

冬，仲孫何忌帥師伐邾。

利取其田，而不顧義。三家所為也。書以惡之。

二年

春王二月，季孫斯、叔孫州仇、仲孫何忌帥師伐邾，取濼。

東田及沂西田。癸巳，叔孫州仇、仲孫何忌及邾子盟于

句繹。

詳叙三卿帥師著其肆暴也是時哀公方五歲三家擅國何所畏忌去春邾子來朝又來奔喪事魯亦極恭矣而復侵不免或以邾子不知以禮為國罪之夫以三家之絕滅天理安足語者觀天王之于狄人可
以見矣。

夏四月丙子衛侯元卒

滕子來朝

晉趙鞅帥師納衛世子蒯聩于戚

靈公卒輒立拒父晉人納之不
得入衛書曰于戚內弗納也

秋八月甲戌晉趙鞅帥師及鄭罕達帥師戰于鐵鄭師

敗績

齊人輸范中行粟鄭人送之士吉射同逆而趙鞅禦于途鄭罕達帥師救之鞅因與戰故曰及所以辨主客也夫以鄭黨叛人固有罪矣但鞅不思所以致亂者已實為之苟能自反歸權于君范中行將覆亡是懼焉敢怙亂况今幸勝且以雋功相與矜夸不知黷武勦民春秋是以並罪之

冬十月葬衛靈公

十有一月蔡遷于州來蔡殺其大夫公子駟

蔡介吳楚二大之間受命于楚而背之既不自安請遷于吳而又自悔背楚誑吳其謀之不臧甚矣及其事急委罪于駟故稱國殺以罪蔡而不去其官也

三年

春齊國夏衛右曼姑帥師圍戚

衛主兵而首齊罪齊黨惡也蓋輒以子圍父而齊助之也

夏四月甲午地震

五月辛卯桓宮僖宮災

桓僖親盡而廟不毀宜為天所災故孔子聞火知其必桓僖

季孫斯叔孫州仇帥師城啟陽

魯黨范氏因懼晉而城也。比年取田城邑兵役相繼罪其勞民也。

宋樂髡帥師伐曹

討樂大心之亂先是曹奉樂大心人蕭以叛也。

秋七月丙子季孫斯卒

蔡人放其大夫公孫獵于吳

公子駟
之黨也

冬十月癸卯秦伯卒

叔孫州仇仲孫何忌帥師圍邾

既盟而又圍之不至于
以邾子益來不止也

四年

春王二月庚戌盜殺蔡侯申

蔡公孫辰出奔吳

蔡昭侯之被弑辰為正
卿必蹤跡可疑故出奔

葬秦惠公

宋人執小邾子

宋見齊伯無成有志與齊爭權然
以無罪執微國之君亦暴而已矣

夏蔡殺其大夫公孫姓公孫霍

晉人執戎蠻子赤歸于楚

書歸于楚猶曰京師楚也晉歷
世主夏盟不競至此春秋所惡

城西郭

備晉也

六月辛丑亳社災

秋八月甲寅滕子結卒

冬十有二月葬蔡昭公

葬滕頃公

五年

春城毗

備晉也說不時夫魯助晉之叛人是無禮義以為城也金湯雖固奚足恃乎

夏齊侯伐宋

為宋人伐曹執小邾子伐之欲爭伯也

晉趙鞅帥師伐衛

為助范氏故是時齊爭晉伯鞅度齊強難與為爭而寅射附衛亦未可猝動於是計納蒯聵以為衛主是將制其心腹掣其肘腋一舉兩得耳然是謀非全美也使晉人能陳大義請天王而號召諸侯

以明父子之道。命公子郢而立之。斯為謀之臧矣。計不出此。安能有成乎。

秋九月癸酉齊侯杵臼卒

冬叔還如齊

會葬也。

閏月葬齊景公

六年

春城邾瑕

瑕邾邑。魯未嘗取邑而遽城之。見魯之迫邾也。

晉趙鞅帥師伐鮮虞

貪伐以自封殖也。

吳伐陳

復修舊怨也。

夏齊國夏及高張來奔

景公放逐長子而樹孽子。高國受託孤之寄。不能以死奉祭。而來奔。所以著其罪也。陳乞謀逐之。念

既遂弑君之行得肆矣

叔還會吳于柤

吳在柤而往會之始結吳好也黃池兩伯魯不得不任其責也

秋七月庚寅楚子軫卒

齊陽生入于齊齊陳乞弑其君荼

陽生入齊而君見弑不書陽生弑而書陳乞則乞之惡著而陽生之罪亦見

冬仲孫何忌帥師伐邾

非滅之不已也

宋向巢帥師伐曹

為樂髡伐之而未服也

七年

春宋皇瑗帥師侵鄭

宋有事于曹意鄭欲援之故侵鄭

晉魏曼多帥師侵衛

衛輒拒父。至今六年。猶未納也。晉不以此致討。而以范中行加兵于衛。故書侵。

夏公會吳于鄆

晉衰而卽齊。景死而事吳。趨利棄義。忍恥蒙羞。惟魯為甚。比年而書公會吳。春秋所惡也。至吳徵百牢。景伯辭而吳人弗聽。非子貢折之。其見辱甚矣。

秋公伐邾八月己酉入邾以邾子益來

不言滅。仍復也。曰入曰來。據事直書。無所諱也。

宋人圍曹

冬鄭駟弘帥師救曹

書圍曹。罪宋也。書救曹。與鄭也。與鄭所以愧齊。晉之不能救也。

八年

春王正月宋公入曹以曹伯陽歸

不書滅。或亦存其祀也。

吳伐我

為魯以邾子益來故。加兵于我。受盟城下。魯蒙羞甚矣。不書盟。諱之也。夫楚人圍宋。易子而食。亦云。

急矣。乃寧以國斃而不肯為城下之盟。今魯未及
虧。遂不顧羞辱而甘為城下之盟。何也。魯之伎倆
于弱則凌于強則懼。蓋不
由禮義而偷生畏死耳。

夏齊人取讙及闡

不書伐兵未加而魯與之。畏之甚也。內失邑不書
諱君辱也。已與之。彼以非義而受。則書取此與濟
西田是也。魯入邾而以其君來。致齊怒吳
伐。故賂齊以說之。魯所得不償所失矣。

歸邾子益于邾

傳謂齊侯使吳請師。將以伐我。乃歸邾子先書吳
伐我。又書齊取二邑。然後書歸邾子于邾。則是畏

吳懼齊而歸之也。易所謂
不威不懲者。小人也哉。

秋七月

冬十有二月癸亥杞伯過卒

齊人歸讙及闡

傳謂季姬
嬖故也。

九年

春王二月葬杞僖公

宋皇瑗帥師取鄭師于雍丘

覆而敗之曰取。謂智力兼備。一軍皆見禽也。

夏楚人伐陳

為陳即吳也。

秋宋公伐鄭

冬十月

十年

春王二月邾子益來奔

先為魯所俘。而又來奔。其不知恥矣。

公會吳伐齊三月戊戌齊侯陽生卒

夏宋人伐鄭

晉趙鞅帥師侵齊

乘吳之亂伐齊之喪。惡之也。

五月公至自伐齊

葬齊悼公

衛公孟彊自齊歸于衛

歸衛從輒也。故十五年
蒯聩入國。彊復奔齊。

薛伯夷卒葬薛惠公

冬楚公子結帥師伐陳吳救陳

吳挾陳以叛楚楚伐陳而吳救不足多也。
蓋吳志在爭諸侯耳。非扶危救患之義也。

十有一年

春齊國書帥師伐我

為去年公會吳伐齊故。故直書伐我。見我自致之
也。邾子齊之甥。以邾子來。齊人為是取我二邑。請
師于吳。其曲在我。及我歸邾子。齊亦即歸二邑。而
辭吳師。直又在齊。我何名。而會吳伐齊乎。書曰惟
甲冑起戎。惟干戈省厥躬。
自反之謂也。書以罪我也。

夏陳轅頗出奔鄭

五月公會吳伐齊甲戌齊國書帥師及吳戰于艾陵齊

師敗績獲齊國書

書及以國書為志乎戰也。齊人皆知吳不可禦。書苟能嚴守備而弗與爭鋒。可以坐困強吳。况以伐魯方歸之罷兵。息肩未久。而欲快志于一朝。安得免師敗而身死乎。故艾陵之戰。深罪書也。

秋七月辛酉滕子虞母卒

冬十有一月葬滕隱公

衛世叔齊出奔宋

十有二年

春用田賦

說改法重賦也

夏五月甲辰孟子卒

昭公夫人也不言夫人諱娶同姓也

公會吳于橐臯

吳欲尋盟子貢却之而止

秋公會衛侯宋皇瑗于鄆

傳謂衛侯會吳于鄆。公及衛侯宋皇瑗盟。而卒辭吳盟。吳人藩衛侯之舍。子服景伯謂子貢曰。吳不

行禮于衛而藩其君舍以難之子孟見大宰乃請
束錦以行語及衛故語曰寡君願事衛君衛君之
來也緩寡君懼故止之子貢曰衛君之來必謀于
衆其衆或欲或否是以緩來其欲來者子之黨也
其否者子之仇也若執衛君是墮黨黨仇
而懼諸侯或者難以伯乎語說乃會衛侯

宋向巢帥師伐鄭

冬十有二月螽

不時記

異也

十有三年

春鄭罕達帥師取宋師于函

宋屢合兵于鄭宜有此取然多殺之慘鄭亦有罪

夏許男成卒

公會晉侯及吳子于黃池

黃池之會先晉者所以存中國之名而書及者所以著兩伯之實吳會中國去王號故稱子

楚公子申帥師伐陳

乘吳出會而伐陳也

於越入吳

吳子方會。越乘其無備而入之。大敗吳師。獲太子。友。吳人告敗于玉。王惡其聞也。自到七人于幕下。夫吳忘不共戴天之恥而求諸侯于外。此越之所以伯諸侯乎。

秋公至自會

晉魏曼多帥師侵衛

以范中行之故而屢與師。卒不見功能。侵而已。

葬許元公

九月螽

冬十有一月有星孛于東方

記異也。

盜殺陳夏區夫

十有二月螽

十有四年

春西狩獲麟

哀

三五

樂庚樓

朱子曰某不敢指定是書成感麟亦不敢指定是感麟作。又曰。大概出非其時。被入所殺。是不祥。蓋麟為仁獸。聖王之嘉瑞也。今出非其時。而虞人戕之。聖心能無傷乎。然則感其不祥而遂絕筆焉。聖人亦非無所寓意也。

春秋說約附錄

聖經絕筆獲麟。弟子欲記孔子之卒。採魯史以續之。至十六年四月而止。韓趙魏共滅知伯。左傳以是終。通鑑以此始。故附錄此于後。

小邾射以句繹來奔

夏四月齊陳恒執其君寘于舒州

庚戌叔還卒

五月庚申朔日有食之

陳宗豎出奔楚

宋向魍入于曹以叛

莒子狂卒

六月宋向魍自曹出奔衛宋向巢來奔

齊人弒其君壬于舒州

秋晉趙鞅帥師伐衛

八月辛丑仲孫何忌卒

冬陳宗豎自楚復入于陳陳人殺之

陳轅買出奔楚

有星孛

饑

十有五年

春王正月成叛

夏五月齊高無平出奔北燕

鄭伯代宋

秋八月大雩

晉趙鞅帥師伐衛

冬晉侯伐鄭

及齊平

衛公子孟彊出奔齊

十有六年

春王正月己卯衛世子蒯聵自戚入于衛衛侯輒來奔

二月衛子還成出奔宋

夏四月己丑孔丘卒

公誅之曰。旻天不弔。不勅遺一老。俾屏予一人以
在位。斃斃予在疚。嗚呼哀哉。尼父無自律。子貢曰。
君其不沒于魯乎。夫子之言曰。禮失則昏。名失則
愆。失志為昏。失所為愆。生不能用。死而誅之。非禮
也。稱一人。非名也。君兩失之。

